



POESIE SOCIALISTE



Alberto Barbata

**La presente pubblicazione
è stata realizzata solo ed esclusivamente per il sito
www.trapaninostra.it**

Su fratelli e su compagne*

Iò ti scrivu nni la me matri lingua
La lingua pacicota di li me avi
Bastardi chi viniano d'ogni pajsi
Di tutti li terri vicini e luntani
A circari furtuna e pani
Vinianu a metiri nna lu feu
Dunni l'oru di li spichi
Era fattu di suduri e lacrimi
Dunni l'acqua era picca sempri
E dunni la siti era siti
Nun c'era fini a sta 'mpussibili litania
Tu chiancivi e sentivi musichi
Nta l'aricchi malati di malincunia
Ma li banneri 'o ventu russi russi
Ti sbattianu 'nfacci
Nu ciauru di libirtà.
E tu 'mmanu nni li 'mmanu
Cantavi <su fratelli e su cumpagne>
E nun ti scantavi nna li strati sulitari
Ivi ddittu a testa auta
Mancu li colpi di scupetta
Ti facianu mali
Satavanu narreri
Comu palli di umma
'I to figghi eri sicuru
nun criscianu cchiù
nall'ummira di li caverni
ma nna lu sulì di l'avviniri
socialista eri, ppi sempri.

* attacco d'inizio dell'inno internazionale dei lavoratori.

19.06.2012 dalla casa sulla collina

Buon Natale 2010
lettera di un socialista triste a sua figlia lontana
dal paese pieno di ricordi impossibili.

Sciroccu
Quannu veni fai mulini
E 'mpazzisciu comu un mazzu
Di fogghi di disì
Pirchè mi giri 'ntornu
Nun sai c'un ci poi
Io sugnu astemiu
Mi chiuru 'ntra na duna
E aspettu chi ti fermi
Mancu a rina mi turmenta
Taliu u mari
E chiù taliu addisiu
La paci di lu funnu
Dunni c'è a taverna
Di eulu e cola pisci
Mi ettu dicu a mia
Ma poi mi nni pentu
E chianciu lacrimi amari
Ma nun mi sentu libbiru
Avia un sognu
Ed eri tu figghia mia
Chi m'abbrazzavi
E mi taliavi rirennu
Mentri i campani sunavanu
Luntanu
Ciarameddi du bamminu
E fiuri di pissepì
Quannu pigghiava a crita
'o ciumi ppi tia.

Pubblicata sul sito www.trapaninostra.it nel dicembre del 2010.

Quannu vinni a cavallaria*

Tu chi pensi chi mi scurdai
I cosi antichi du paisi mia
Li curtigghia e li vaneddi
Quannu jamu a circari voti
Nta li cristiani antiani
E nna li fimmineddi sulì
Chi ci diciamo?
Vossia si ricorda
Quanni vinni a cavalleria
E li frustati nna li spaddi
Di u zu Peppi e du zu Bastianu**
Nta l'acchianata da biviratura
'mezzu lu chiantu di li picciriddi
E di li matri 'nta la via
Me nonnu cantava <addiu luganu bedda>***
E ci dissi a cola viridi
Io ti sparù nta la frunti
Nun veniri chiù davanti a mia
Io sugnu di chiddi
Chi scantu nun tennu
Di li malandrini comu a tia
Jò gridu ovunque la dispirazioni
Di la genti mia
Triunfirà la banneria mia
Viva lu socialismu e la libirtà.

19.06.2012 dalla casa sulla collina

*La cavalleria del generale Codronchi venuta a Paceco a sedare un tumulto di contadini.

** i due personaggi sono figure importanti della storia del movimento contadino e del partito socialista di Paceco : Giuseppe Paesano e Sebastiano Basiricò.

Ad Angelica Balabanoff *

Quannu moru
Purtatimi ca fanfara
'O feu di Zafarana**
Magari agghiummunatu
Nta na banneru russa
Cu stemma du suli
E si cantati qualchi innu
Di sicuru viririti
Facci strani 'nte bordi da strata
Vistuti di 'ntoccu
Cu cammisi arripizzati.
Quannu moru
Purtatimi a Zafarana mia
Li vuci sarrannu vicini
'Nta l'aria di maggiu
Carma e pacienza
Un corteu 'nterminabili
Di cani di mannara
E li bianchi pecuri
Chiancirannu 'mme 'mme
Chi cunsulationi
Chi fantasia
U zu Petru e u zu Jacu
forti parravanu
E ci dicianu a li viddani
Cumpagni u ventu vinni
U ventu chi trascina tutto
Pinsati a Russia
E cumpagni chi morinu marturiati
Jò li sentu vicini
Comu Angelica quannu vinni o paisi
E i parrini nun la vulianu
Seppellitimi ora a Zafarana
Nta li tombi preistorici
Supra li muntagnoli viridi
Dunni crisci a burrania
E i ciuri di maju
Attaccatili 'nte carretti
E ghittatini un mazzu
'Nta fossa pi mia.

* Angelica Balabanoff nota rivoluzionaria russa venuta a Paceco nel 1913, inviata dal partito, espressamente per comiziare a Paceco e tenne discorso nella Chiesa di San Francesco di Paola.

** Zafarana , noto feudo a pochi chilometri da Paceco, dove i socialisti si recavano in corteo ogni anno per celebrare il primo maggio ma anche durante le lotte contadine del 1920-1922 ad occupare le terre degli agrari trapanesi.

A Ninetta Giganti eruina nostra*

A lu passu di Baiata mi purtaru
Dunni nun si arrubbatu
si Gingu nun c'è o è malatu
E 'nterra lu truvai
Cu l'occhi rivolti a lu celu
Cristu 'ncruci mi paria
Afflittu misiru e strazzatu
Ninu ninu cuminciai a vuciari
Ma lu silenziu era funnu
Atroci lu sulì disgrazziatu
E mi truvai sula svinturata
Arrivaru li cumpagni
Dispirati chiancianu
Ma io ci dissi
Iti a fari lu vostru duviri
Iti a vutari eccovi li schedi
Lu maritu meu accussi vulia
<<eruina nostra>>
Vuciau Bastianu Bunfiggghiu
Ninetta ora gramagghi porta
E 'mpettu l'effigi tua
Na lu prufunnu di lu cori
Nun c'è vuci
Chi chiama e nun senti
Arrizzanu li carni
Brividu scurri nall'aria
Nu jocufocu ranni
Scoppiau forti
La nostra vita era canciata
Pi sempri russa era la nostra banneru.

Domenica 23 giugno 2012 dalla rocca d'emilio

- Ninetta Gigante moglie di Nino Scuderi, segretario cooperativa agricola, sindacalista, consigliere comunale socialista di Paceco, ucciso dalla mafia nel 1922.

Li fasci siciliani di lu 1894

«a Giacomo Montalto apostolo del sol dell'avvenire»

Chi movimentu, chi vuci
U pajsu meu era chinu di taverni
E di putji d'artigiani
Dunni si travagghiava assai
Pi varagnari nenti
E tuttu lu jornu travirsatu
Di armali e di cavaddi scappati
Li vuci di li pisciara la matina
E l'abbanniata cantilena
Di strata in strata
Di curtigghiu in curtigghiu.
E a sira si jucava assai
Nta lu trappitu sutta a chiazza
Nun c'era versu
Ma si nun ci cririti
Vi cuntatu comu li cosi canciaru.
"braccianti arruspigghiaviti"
Ci dissi Jacu Muntaltu
e puru Vicenzu Curatulu farmacista
i lezioni du Fasciu
sfasciaru lu jocu
di li reazionari
"cuminciati a 'mparari qualcosa"
E poi li sciopiri
pi l'aumentu di lu salariu
na subillationi contro lu statu
dissiru li sbirri 'nfami
e un ghiornu a la prima calunia
si li purtaru 'ncatinati
a la vicaria
nmezzu lu purvulazzu di lu stratuni
a la vicaria
seguiti da lu chiantu di li fimmini
e di li picciriddi
ma lu 'ncantesimu s'avia ruttu
iddi nun erano cchiù figghi di diu
eranu sicialisti
figghi di lu populu ribelli.

Bannera russa triunfirà 1952

Lentu lu carrettu
E li casi bianchi
Nta la strata 'nfinita
A mari iamu
a Nubia iamu
E cantavamu
Bannera russa triunfirà
Chi ciaru di sali
Li fimmini 'ntrizzavanu
E io picciriddu
Nun viria l'ura d'arrivari
Arrivanu i nostri
A cavallu di un cavà
E li casi purtavanu ancora
I colpi di la mitraglia
C'era nall'aria
Un sensu di risvegghiu
La verra avia finutu
E ni cuminciava nautra,
Chidda da fami.
Bannera russa, avanti cumpagni
Zu Peppi Campestru
Forza, assa cogghi ssi voti
Emu a vinciri
Bloccu du populu
A testa di garibaldi
Senza sbagghiari
A mari, acqua vogghiu
Mi ettu sugnu filici
Forza cumpagni
Sutta a turri du raisi
Nun c'è scampu
Ora o mai chiù
Bannera russa triunfirà.

A Purtedda di la Ginestra na lu cinquantesimu annivirsariu

Sa matina chiuvia
E arrivammu a Purtedda
Totò ti lu ricordi
Eravamu tu e io
Cu li nostri mughieri e li picciriddi
I due vardi e lu labaru
Comu putia nun essiri priseni
Lu paisi nostru
Paceca mia
Lu paisi di li sicialisti
Poi scampau
Ma aviamu mmanu lu paracqua
Nun sapiamu soccu putia succederi
E aspittavamu li curtei
Si preparavanu li microfoni
Io rimasi mpalatu
Mmezzu di la chianura
E i cirasi eranu ciuruti
E taliava la petra di barbatu
E pinsava tanti cosi
Sintia un soffiu unta lu coddu
Comu un coru d'angiuli
Mi votu e mi scantu
Darre di mia un quadratu d'omini
Vistuti di niuru auti e beddi
Mmezzu l'omu di capiddi bianchi
Lu procuratori
lu ricanuscii
Mi fici un signali d'ntisa
Io mi carmai e cuminciai a taliari
Di Partinicu arrivavanu
Di Chiana l'altu curteu
E tanti banneri russi e labari
Mi s'appannaru l'occhi
Fermu immobili viria
Di luntanu viria
Me ziu cu me patri nicareddu
E me nonnu cu la scocca niura
Vinianu e mi misi a chianciri
Eranu iddi i sicialisti mei
Presenti dicianu
E io chiancia lacrimi caudi
E nun mi fermava
Caminava e purtava 'ncoddu
Na bedda banneru russa.

Paceco 26 giugno 2012 dalla piazza granni di li socialisti.

A Vanni Venturini cumunista E ai cumpagni che suffrirunu lu cunfinu

Vanni stanotti mi vinisti 'nsonnu
E mi cuntavi tanti cosi
Chi facisti mi dicivi
Cuntali li cosi mei nun ti scantari
Tu lu sai quantu suffrivi
Nnucenti finivi dda luntanu di 'ncasa
Ma 'ncarciri io criscivi
Tuttu mparai puru Danti
Lu patri nostru di la puisia
U profissuri era sempri cu mmia
Nun lu lassava mai
Chi malincunia figghiu meu
Ntornu 'ntornu di mia
Sucialisti e cumunisti
Aspittavanu lu jornu
Di la libirtà e di la giustitia
Finiri avianu ssi jorni amari
Intantu io liggia liggia
E 'nfacci di lu mari
L'isula era la me terra
E sunnava però Paceca mia
Mi sintia disprizzatu
Ma ssi 'ntellettuali
Nun avianu cunfini
Eranu omini libiri
E mi 'nsegnaru a luttari
E divintai cumunista
Comu lu maestru meu
Grazzi figghiu meu
Fallu sapiri
Caminu nmezzu li nuvuli bianchi
E portu sempri na banneru russa.

A li Cuffari

Prima chi finisci u munnu
Iò ogni sira m'assetu sutta li stiddi
Pi nun dimenticari
Li fatti socialisti
Chi smossiru la storia
Iò li chiamu
I socialisti mei
Iddi du paradisu
Dicinu prisenti
Cuffari dunni siti
So patri ci mittia nomi strani
Giordanu Brunu ti chiamau
Nomi libertari
Nomi socialisti
Chi vizio c'avivu
Ogni primu maggiu
A notti prima
Appizzavu na banneruzza russa
Supra li fili du telegrafu
Idda pinnuliava
E stava ferma
Cu na pitruzza
La polizia fascista
Vi circava e un capiva
Ma doppu na perquisizione
Dintra na pila n'attruvaru
Una, nica, russa bannerera
All'isula vi purtaru
All'isula di Lipari
Parteru patri figlio
E puru lu picciriddu nicu
Cumpagni nun dimenticati
Io c'ivi a Lipari
C'è na lapidi
N'un muru appizzata
Chi ricorda all'italiani
Tutti chiddi chi sufferu
Dda spirduti e sulì.

I Cuffari erano una famiglia pacicota, i Basiricò, emigrata agli inizi del novecento a Xitta, dove Furono operatori e animatori politici. Per la loro passione politica furono arrestati dalla polizia fascista ed inviati al confino all'isola di Lipari.

Questo ramo dei Basiricò era soprannominato <<Cuffari>> perché di professione erano fiscalai, cioè fabbricatori di coffe per i trappeti dell'olio.

Dicitimi pirchè

A li fratelli Spatula morti a vint'anni a lu ponti salemi Ppi manu di li mafiusi

Iò sintia cuntari
Nun mi lo scordu cchiù
Chi successi
E dicitimi pirchè
Si raperu li catarratti di lu celu
Saetti a zig zag
E acqua a catinelli
Li vuci di li fimmini
Acchianavanu nall'aria russa
Nun c'era postu nta lu paisi
Dunni un si chiancia
E si trimava
Pirchè pirchè
Li purtaru 'ntrapani
Du ponti di salemi
Muti rimasiru
Tutti ed erano tanti
Dunni siti picciriddi
Vintanni avivu
Nta stu paisi
Comu 'nta via crucis
Ci sunnu posti dimenticati
Dunni a notti
L'animi 'npena
Nun si nni vonnu jiri
Socialisti eranu
Sucialisti veri
Russi comu lu sancu di lu signuri
E si spasciau na granni famigghia
A picca a picca
S'inneru luntanu luntanu
Abbannunnaru Paceca mia
Lu paisi chi vulianu rinnuvari
Io li vitti na notti chi passiava
Pi li strati antichi e sulitari
Vulavanu supra i casi
Mariu e Petru Spatula
Purtavanu 'ncoddu na gran banneru russa
E janu gridannu la rabbia antica
Sucialisti semu
Sucialisti semu.

A Carlu Spatula partigianu mortu a Paduva na lu 1944 Pi rappresaglia di li nazisti.

Carlo ultimu paladinu
Garibaldinu Cloridanu
Chissa si chiancivi
Dintra o to cori
Quannu li nazisti ti purtaru
A la strata di li dui ponti
Pi ammazzariti
Nsemnulla a natri sei partigiani
Puru sautra sventura
Appi a suppartari a to famiggia
To patri nun c'era cchiù
E manco a matruzza tua
Nun sappiru nenti
Ma i to soru si mazzuliavanu
E vulianu sapiri
Chi fini avivi fattu
Carlu spavaldu e curaggiuso
Sicuramenti chiancivi
E niatri ora ti pinsamu
Si, a Paduva
C'è na strata chi si chiama
Di li Setti Martiri
E o cimiteru nall'arca di l'eroi
C'è puru u to nomi
E puru nna la strata
Ci purtanu i ciuri
Quartieri sestu
Nun vi lu scurdati pacicoti
Lu poveru maestru socialista
Era Spatula
Un libbru interu si po scriviri
Riposa Carlu
Cu na bedda banneru russa
Attaccata a lu coddu marturiatu
Socialista eri
Un beddu socialista.

A Elisa e Petru chi si maritaru o municipiu pi nun tradiri lu partitu e li cumpagni

Iò nun saccio s'è sonnu
O è un fantasima chi mi persecuta
Fatta sta chi ogni notti
di la finestra chi s'affaccia su la chiana
Davanti all'occhi
M'appari un trenu anticu
Di chiddi ca fumalora e u terrazzinu
Chi va avanti e narreri
Lungo la linea fizzata
Chi porta di Paceco a Marsala
Nun si ferma mai
Pari chi si ferma
Sferragghia forti forti
E poi torna 'ndietru
E si sentunu vuci
E sonu di campani
Di li finestrini s'affaccianu
Omini picciotti e picciriddi
Sventulanu banneri russi
E improvvisu un fulmini
Illumina i sedili di lignu
Di terza classi
Sunnun tutti prisenti
E dicinu cca semu
'mmezzu ci sunnu du ritratti
Sunnun Elisa e Petru
Emu o comiziu e poi vinemu
«Iò ci dissi, sì lu vogghiu
E a chiesa mi la scurdai
Pi mmia l'amuri vinciu
E lu socialismu
Banneru russa minni fazzu na cammisa
E poi l'appizzu comu stinnardu
Su lu balcuni meu
Vicinu o municipiu
Dunni m'aspettanu i cumpagni
Chi mi battinu i manu
Svintuliannu
i fazzoletti russi
di lu culuri eternu
chi nun mori mai».

**A Petru Paisanu
ultimu sicialista ardenti
nta la chiazza granni di li sicialisti pacicoti**

Iò ti vitti na matina
comu nun t'avìa vistu mai
niatri eramu assittati
nna la chiazza granni
dunni tu avivi cumiziatu
e tanti voti t'avivi sciarriatu
ma chi tristizza nta la to facci
paria chi chiancivi
e sicuramenti pinsavi
quantu n'avivi nto cori
lacrimi agghiummunati
dunn'eranu tutti chiddi
c'avivi aiutatu nta la to via
ma eranu sicialisti
tu dicivi
e portanu nna granni bannera russa
svintuliava
a lu sulì di l'avviniri
e u cori ti chianciva
ospitali mi nnaiu a ghiri
accumpagnami
e un garofanu russu
portami darre a chiesa du cimiteru
sugnu mortu
e ancora aiu a muriri.

Sommario

Su fratelli e su compagne*	3
Buon Natale 2010.....	4
lettera di un socialista triste a sua figlia lontana	4
dal paese pieno di ricordi impossibili.	4
Quannu vinni a cavallaria*	5
Ad Angelica Balabanoff *.....	6
A Ninetta Giganti eruina nostra*	7
Li fasci siciliani di lu 1894.....	8
«a Giacomo Montalto apostolo del sol dell'avvenire»	8
Bannera russa triunfirà 1952.....	9
A Purtedda di la Ginestra na lu cinquantesimu annivirsariu.....	10
A Vanni Venturini cumunista	11
E ai cumpagni che suffrirunu lu cunfinu.....	11
A li Cuffari.....	12
Dicitimi pirchè	13
A li fratelli Spatula morti a vint'anni a lu ponti salemi	13
Ppi manu di li mafiusi	13
A Carlu Spatula partigianu mortu a Paduva na lu 1944.....	14
Pi rappresaglia di li nazisti.	14
A Elisa e Petru chi si maritaru o municipiu pi nun tradiri lu partitu e li cumpagni	15
A Petru Paisanu, ultimu sicialista ardenti nta la chiazza granni di li sicialisti pacicoti	16

© Alberto Barbata - 2022

I testi presenti all'interno di questo libro possono essere utilizzati dopo aver ricevuto l'autorizzazione dell'autore e citando lo stesso